



Damas d'honor empeilan il til atras Glion. Biars hosps surtut dalla politica han fatg la spassegiada dalla staziun da viafier entochen el marcau vegl nua ch'igl act festiv ha giu liug.

FOTO HANS HUONDER

## Fin d'jamna ell'enzenna dallas Treis Ligias a Glion

Uonn festivescha il cantun Grischun igl anniversari da 500 onns dalla fusiun dallas Treis Ligias. Quella fusiun ei stada il fundament pil cantun Grischun dad oz. La fin dall'jamna vargada ei quei tiern historic vegnius festivaus pompusamein a Glion sut il motto «far punts». Glion ha purschiu in vast ed interessant program da historia, cultura e divertiment.

HANS HUONDER/FMR

Sonda e dumengia ha Glion giu bien motiv da far fiasta e da sereguardar dalla fusiun dallas Treis Ligias avon 500 onns. Quei ha la vischnaunca d'Ilanz/Glion fatg cun in oreifer program da fiasta e divertiment. Vegnida lantschada ei la festivatad cun in til dalla staziun dalla viafier entochen el marcau vegl. Regenza grischuna, hosps e delegaziuns ein la fin finala s'entupai silla piazza da s. Margreta. Leu ha igl act festiv giu liug. Il chor cun 60 affons dalla quarta entochen la sisavla classa primara sut la direzziun da *Sabrina Sgier* e la Societad da musica Glion sut la direzziun da *Daniel Kollegger* han purschiu il beinvegni musical.

### Plaids e musica

Silla tribuna erigida specialmein per quella fin d'jamna da fiasta han *Ursina Jecklin* e *Rino Caduff* dil comite d'organisaziun beneventau ils hosps e biars auters che han anflau la via la sonda egl'empremarcau spel Rein ni sco Ursina Jecklin ha detg: «Il Rütli dil Grischun.» Il marcau da Glion seigi il liug dalla tginna dallas Treis Ligias. Ils 23 da settember 1524 ei vegniu fatg leu il pact per la fundaziun dalla republica grischuna ch'ei lu daventada 1803 ina part dalla Confederaziun. Rino Caduff ed Ursina Jecklin han denton buca mo beneventau, mo bein era engraziu: «Senza donaturs e biars voluntaris, mo era fatschentas ch'ei segidadas, fuss ina tala fiasta buca pusseivla.» La fin d'jamna ei stada sut il motto «far punts»: Far punts dil temps vargau cul temps modern ed aschia colligiar las generaziuns e las gruppas linguistics dil Grischun. Il president dalla vischnaunca d'Ilanz/Glion, *Marcus Beer*, ei aunc ius in pass pli lunsch: «Uonn astgein nus era festivar il giubileum da diesch



Hosps dil giubileum sin viadi el liug da fiasta el marcau vegl da Glion (da sen.): il president dil Cussegl grond *Franz Sepp Caluori*, la cussegliera guvernativa *Carmelia Maissen* ed il president dalla regenza grischuna, cusseglier guvernativ *Jon Domenic Parolini*.

FOTO HANS HUONDER



La historia dallas Treis Ligias inscenada en in teater el liber ella cuort dil Museum regional Surselva.

FOTO MATTIAS NUTT



Armas e vestgadira sco perdetgas da temps passai.

FOTO HANS HUONDER

onns dapi la fundaziun da nossa vischnaunca Ilanz/Glion. Sco tier la reuniun dallas Treis Ligias ei era quei stau in act da s'avischinar per cooperar.»

### Far punts da temps e generaziuns

El center dils plaids festivs per quei giubileum da 500 onns dapi la fusiun dallas Treis Ligias ei secapescha la historia stada, mo lu era parallela da pli baul cul temps dad oz. «Tut tenor il motto far punts da temps e generaziuns. Da capir la historia e formar igl avengir», puntuescha il president dalla regenza grischuna, cusseglier guvernativ *Jon Domenic Parolini*. Las libertads proclamadas dalla Treis Ligias seigen stadas aschidadir ils percursurs dil referendum e dall'iniziativa: «Las vischnauncas han retschert in dretg da conceder.»

### Fiastas buca mo a Glion

Il marcau da Glion ei staus la sonda e la dumengia ell'enzanna dil tiern historic, mo era dalla cultura dil temps medieval. Bia glied en vestgadira, utensils ed armas da gliez temps ha circulau ellas streglias dil marcau vegl ed aschia dau ad el ina tempru tut special. Sper ina fiera historica cun products regionals dall'entira Surselva ha Glion purschiu in'inscenaaziun teatrala ella cuort dil Museum regional Surselva e referats. Pliras casas patrizianas el marcau vegl ein stadas aviartas e leutier han ils pli bials costumes historics concurrenzau. Il Museum regional Surselva muossa plinavon in'expoziun speciala «13 x Ilanz/Glion. Cumin e cuminonza.» Fiastas seme-gliontas sco la fin d'jamna dat ei quest onn era a Cuera e Tavau – ils dus ulteriurs loghens dallas sedutas dallas Treis Ligias, mo lu era a San Vittore, Brusio, Val Müstair e Samedan.